

Bjelašnica

Alpsko smučanje – muškarci

Jugozapadno od Sarajeva, 25 km od centra grada, prostire se razgranati masiv planine Bjelašnice. Pola godine nalazi se pod debelim snježnim pokrivačem. Zahvaljujući činjenici da se nalazi na klimatskoj granici kontinentalne i mediteranske klime, obiluje snježnim padavinama, te debljina snježnog pokrivača često prelazi visinu i od dva metra. Posmatrano geografski, spada, kao i Jahorina, u sklop Dinarskog planinskog sistema. Njen masiv pruža se u Hercegovinu, čak tamo do rijeke Neretve. Masiv Bjelašnice obuhvata prostranstvo sa više vrhova od oko 2000 metara, od kojih najviši doseže 2067 metara, gdje se nalazi poznata meteorološka observatorija i TV relej. Površina između 1500 i 2000 metara je bez šume, pokrivena planinskim pašnjacima.

Padine Bjelašnice idealne za smučarski sport posjećivali su planinari-smučari još odavno. Sada, zahvaljujući svojim izuzetnim karakteristikama i Olimpijskim igrama, ovo se široko planinsko područje otvara, ne samo za velika smučarska takmičenja, već i za najširi razvoj smučarskog sporta i turizma. Za sada je obrađen sjeveroistočni i istočni dio planine ispod vršnog dijela gdje se nalaze staze za muške alpske discipline. Ovdje je na prirodno veoma povoljno oblikovanom terenu, prosječno na površini od 692.280 m² ukupno 8.345 metara staza za spust, veleslalom i slalom, kao i za treninge u olimpijskom smučanju. Za potrebe takmičara i smučara-turista uz ove staze izgrađene su po jedna trosjedežnica i dvosjedežnica, kao i tri ski-lifta. Na rubu prostranog područja zvanog Babin do, gdje se nalazi ciljni prostor

olimpijskog spusta izgrađen je moderan objekt koji će za vrijeme Igara služiti kao pres-centar, dok će u postolimpijskom periodu to biti omladinski sportski hotel. Na ciljnim prostorima spusta u Babinom dolu te veleslaloma i slaloma u Stinjem dolu nalaze se moderni i konfornt ciljni objekti snabdjeveni svim potrebnim tehničkim uređajima.

Posebna karakteristika tog novog smučarskog centra je što sa Igmanom predstavlja jedinstveno područje za sve smučarske sportove od alpskih disciplina, skijaškog trčanja i biatlona, do skijaških skokova na Malom polju. Dvije savremene komunikacije, jedna preko Krupca, a druga preko Nedžarića povezuju ova olimpijska borilišta sa centrom Sarajeva.